

lokal



LEPASAN DIPLOMA JADI PEMBANTU RUMAH

'Bukan mereka bagi saya makan'

Sebut mengenai pembantu rumah, pasti sinonim dengan wanita warga Indonesia dan negara jiran lain.

Buktinya ramai majikan di negara ini yang menggajikan pembantu rumah warga asing.

Hakikatnya ada juga warga tempatan yang mencari rezeki sebagai pembantu rumah meskipun memiliki kelulusan akademik.

Malah segelintir majikan kini lebih gemar memilih mereka berbanding warga asing bagi mengelak proses rumit.

Ikuti laporan wartawan **Redzuan Muharam** berhubung isu ini.

Ipoh

"Memang ada segelintir rakan dan ahli keluarga yang pandang rendah, tetapi saya tidak ambil pusing kerana bukan mereka beri saya makan sebaliknya saya kena tanggung diri sendiri," kata Rozita Amad Mazlan.

Rozita, 28, memiliki diploma dalam pengajian Sains Komputer lulusan sebuah universiti tempatan namun memilih menjadi pembantu rumah sepenuh masa sejak enam bulan lalu.

Bukan mahu mensiasikan kelulusan yang ada na-

mun kesukaran mencari pekerjaan menyebabkan dia memilih menjadi pembantu rumah walaupun ada segelintir individu di sekelilingnya mempertikaikan keputusannya itu.

"Selepas tamat belajar, saya bekerja dan bantu uruskan kebun ayah.

"Puas sudah saya cuba dan berusaha mencari pekerjaan, namun belum jumpa yang sesuai.

"Memandangkan harga barang meningkat dan sangat perlukan duit untuk bantu ayah, maka saya cuba nasib dengan menjadi pembantu rumah selepas terlihat iklan di laman sosial," katanya ketika dihu-



Majikan juga sangat prihatin dengan kebajikan saya"

Rozita

bung, baru-baru ini.

Meskipun tiada pengalaman, Rozita berkata, dia tidak kekok untuk bekerja kerana sudah diberi latihan di akademi agensi pembantu rumah.

"Latihan itu sedikit sebanyak dapat mempersiapkan diri saya sebelum bekerja dengan majikan.

"Setakat ini, kerja berjalan lancar dan saya seronok serta bersyukur kerana dapat layanan baik daripada majikan.

"Majikan juga sangat prihatin dengan kebajikan saya malah sediakan keperluan asas termasuk tempat tidur selesa dan juga makan serta minum, jadi ji-

mat duit saya kerana tidak perlu berbelanja.

"Keseronokan bekerja membuat saya sudah mengangap majikan seperti keluarga sendiri," katanya.

Soal gaji pula, Rozita mengakui pendapatan diterima agak lumayan bagi dirinya yang tiada pengalaman dan berbaloi dengan kerja dilakukan.

Hasil pendapatan itu, Rozita berpeluang membeli kelengkapan berjenama yang diidamkan selama ini.

"Cuma cabaran tetap ada, salah satunya perlu menguruskan dan melayan karenah serta ragam budak

yang agak aktif.

"Tugas itu menuntut kesabaran tinggi namun saya tidak anggap ia sebagai masalah besar kerana masih boleh dikawal.

"Sebagai rakyat Malaysia, saya berpendapat pekerjaan sebagai pembantu rumah sangat sesuai untuk mereka yang hendakkan kerja halal dan gaji tetap tanpa kelayakan akademik tetapi dapat pendapatan seperti ada kelulusan tinggi.

"Harapan saya agar dapat terus bekerja sehingga cukup kumpul duit dan pengalaman untuk bantu keluarga sementara dapatkan pekerjaan lain," katanya.

Jadi pembantu rumah sebab nak ubah nasib keluarga

Kluang: Demi mencari rezeki bagi menyara tiga anak, wanita dikenali sebagai Faridah yang berstatus ibu tunggal sanggup bekerja sebagai pembantu rumah sepenuh masa.

Faridah, 27, sebelum ini mencari rezeki sebagai tukang jahit, namun pendapatan yang rendah dan tidak menentu mendorongnya menjadi pembantu rumah.

Menurutnya, anak yang masih kecil menjadi pendorongnya untuk bekerja sebagai pembantu rumah kerana melihat ia sebagai peluang mengubah nasib keluarga.

"Waktu jadi tukang jahit, tempahan diterima memang tidak menentu, kadangkala tiada langsung dan berikutan harga barang semakin naik, saya terpaksa cari kerja lain yang lebih sesuai untuk sara keluarga.

"Lagipun, anak saya masih kecil, baru berumur dua, empat dan enam tahun, jadi saya perlu cari duit lebih untuk membesarkan mereka.

"Ikutkan sudah banyak tempat saya pergi untuk mohon kerja tetapi kebanyakannya mahu kakitangan yang ada kelulusan akademik dan saya sedar diri.

"Jadi, saya terima saja peluang kerja sebagai pem-

bantu rumah," katanya ketika dihubungi, baru-baru ini.

Bercerita lanjut, Faridah berkata, pada awalnya dia agak kekok dan kepenatan kerana perlu menguruskan banyak hal di rumah majikan.

"Minggu pertama bekerja, saya agak malu dan kekok juga kerana perlu ke- mas serta uruskan rumah yang besar.

"Bagaimanapun majikan layan saya dengan baik malah beri akses Internet, jadi dapatlah saya berhubung dan membuat panggilan video dengan anak.

"Keseronokan saya adalah waktu gaji yang pertama kerana dapat belikan mainan untuk anak dan li-

hatnya main dengan seronok," katanya.

Meskipun begitu, cabaran Faridah adalah tidak dapat membawa anak bersama ketika bekerja.

"Tetapi saya faham kerana jika anak ada bersama, kemungkinan akan susah majikan dan saya ketika bekerja.

"Mujurlah abah ada bantu jaga anak di kampung ketika saya bekerja.

"Jadi, saya bersyukur dan untuk orang di luar sana, jangan takut untuk cari peluang kerja bagi tingkatkan diri kerana rezeki tidak salah alamat.

"Jika satu pekerjaan itu kita tidak dapat, mesti ada pekerjaan lain yang sesuai," katanya.

Jauh di sudut hati, Faridah berharap dapat berkhidmat dengan majikannya sekurang-kurangnya sehingga tamat kontrak atau dapat pasangan baru.



"Minggu pertama bekerja, saya agak malu dan kekok juga"
Faridah